

**Uunga siunnersuut: Suliffissarsiornermut ikiorsiissutit pillugit Inatsisartut inatsisissaat aamma uunga siunnersuut: Pisortanit ikiorsiissutit pillugit Inatsisartut inatsisissaattut siunnersuut**

(Isumaginninnermut, Suliffeqarnermut Nunamullu Namminermut Naalakkersuisoq )

**Saqqummiussinermut allakkiaq**

(Isumaginninnermut, Suliffeqarnermut Nunamullu Namminermut Naalakkersuisoq )

**Siullermeerinnineq**

Naalakkersuisut matumuuna saqqummiuppaat suliffissarsiortunut ikiorsiissutit pillugit Inatsisartut inatsisissaattut siunnersuut aamma Pisortanit ikiorsiissutit pillugit Inatsisartut inatsisissaannut siunnersuut.

Siunnersuutit taartaasussapput maanna malittarisassanut suliffissarsiortunut ikiorsiissutinut aamma pisortanit ikiorsiissutinut, kaammattuutaassallutillu innuttaasut suliffissarsiorumanerulernissaannut, pitsanngorsaassallutillu innuttaasut atugaasa pitsanngorsarneranni siunnerfilersorneqarnerannilu.

Siunnersuutit aaqqissuusseqqinnermut pisortanit ikiorsiissutinut malittarisassanik aamma suliffeerunnermi ikiorsiissutinut / suliffissarsiortunut ikiorsiissutinik suliaapput Naalakkersuisut naalakkersuisoqarfinni suliassaqarfiit akimorlugit suleqatigiissitami nunatsinni imminut pilersortuunerup annertunerulersinnissaanik siunnerfeqarnerup ilaatut, ersarissunillu anguniagaqarlutik, suliffissaaleqisut tamarmik imminnut pilersorsinnaanermik akisussaaffeqarsinnaanerulernissaannut.

Maannamut atuuttunut malittarisassanut sanilliullugit tungaviusutigut allannguutit tassaassapput suliffissaaleqisup siunissami suliffissarsiornermut ikiorsiissutinut innersuunneqartalernissaa imaluunniit pisortanit ikiorsiissutinut innersuunneqartalernissaa, apeqqutaatillugu sulisinnaassuseqarneq sapaatip akunneranut sivikinnerpaamik akunnerni 20-  
ini. Tassa imaappoq suliffissaaleqisoq sulileriaannartut isigineqarnersoq apeqqutaatillugu.

Maannamut sulinermik inuussutissarsiuteqartut nammineq pisuussutiginngisamik suliffissaaleqisut il.il. pisinnaatitaagaluarput suliffeerunnermi ikiorsiissutinik sap. ak. 13-it angullugit.

Suliffissarsiortunut ikiorsiissutit nutaat piffissamut killiligaassanngillat, piumasarineqanngilarlu suliffissaaleqisup sulinermik inuussutissarsiuteqartuunissaa. Taarsiullugu piumasaqaataavoq suliffissaaleqisup sulileriaannaanissaa.

Suliffissarsiornermut ikiorsiissutit annikillineqartassapput apeqqutaatillugu qanoq sivistigisumik suliffissarsiortuusimaneq. Tamanna isumaqarpoq suliffissaaleqisut sulileriaannaat pisortanit ikiorsiissutinik qinnuteqartariaqassanngitsut, taarsiulluguli siunnerfilersugaasumik sullinneqassallutik Majoriaq aqutigalugu, suliffissarsinissamik siunertaqartumik.

Pisortanit ikiorsiissutit pilersornermut atorneqartussat maannamut annertussusilerneqartaraluarput pineqartup inuup pisariaqartitsineranik nalilersuinermik tunngaveqartunik. Taamaattumillu kommunimiit kommunimut pisortaniit ikiorsiissutit assigiinngitsorujussuusarsimallutik.

Siunissami pisortanit ikiorsiissutinik pisartagaqartut ikiorsiissutinik annertussusileriikkanik pisartagaqartinneqartalissapput, nammineq aqutassaminnik. Tamatuma qularnaassavaa kikkut tamarmik Inatsisartut inatsisaat naapertorlugu naligiissinneqarnissaat, pisortaniillu ikiorsiissutinik pisartagaqartut aningaasaqarnerminnik nammineq aqutsinerat annertunerulissasoq.

Kommune taamaallaat pisussaaffeqalissaaq iliuusissanut pilersaarusiornissamut pisortanit ikiorsiissutinik pisartagalimmut sulilernissamut piareersimasunnngornissamik siunnerfeqartumik, taamalu suliffissarsiortunut ikiorsiissutinik pisartagaqarnermut, neriuutigalugu aalajangersimasumik suliffeqalernissaaq. Pisortanit ikiorsiissutisisartoq ilutigisaanik pisussaaffeqalissaaq eqeersimaartumik iliuusissanut pilersaarusiornermi peqataanissamut.

Iliuusissanut pilersaarummi pisortanut ikiorsiissutisisartup ataatsimut inissisimanagera ilaassaaq, pineqartumut namminermut tunngasuussalluni, suliffissaaleqisoq pitsaanerpaamik ikiorneqarsinnaaqqullugu.

Iliuusissanut pilersaarutip ilaatut ingerlaavartumik nalilersuisoqartassaaq pisortanit ikiorsiissutinik pisartagallip suliffissarsiortunut ikiorsiissutinut nuussinnaaneranik, imaluunniit allatut aaqqissuussisoqartariaqarnersoq, soorlu siusinaartumik pensionisiaqalernissaaq eqqarsaatigalugu.

Suliffissaaleqisullu sulileriaannaanersut tunngavigalugit tulluarsaqatigiinnut inissinneqartarnerisigut pisortanut ikiorsiissutit inuiaqatigiinni sanngiinnerusumik inissisimasunut sammisumik ikiorsiissutaasinnaapput.

Pisortanit ikiorsiissutit taamaasillutik siunnerfilersorneqarsinnaapput innuttaasunut annertuunik unammilligassaqartunut ikiortariaqartunullu. Assersuutigalugu tassaasinnaavoq atonerluisuuneq, tarnikkut imaluunniit inooqataasut allatigut ajornartorsiuteqarnek, innuttaasup nalinginnaasumik suliffeqarsinnaannginneranut pissutaasoq.

Paarlattuanik suliffissaaleqisut sulileriaannaasut suliffissarsiornertik aallussinnaavaat, pikkorissaqqissinnaallutik ilinniaqqissinnaallutilluunniit, tamarmik aqqutissiuusseqataasussat piginnaaneqarnerulernissamut aalajangersimasumillu suliffeqalernissamut.

Siunnersuutit siunertaraat inuiaqatigiinnik imminut napatissinnaasunik pilersitsiartuaarneq, amerlanerusut suliffeqarnerisigut taamalu inuiaqatigiinnik pilersueqataanerisigut, ilutigisaanillu suliffissaaleqisut tamarmik imminut pilersortuulernissamut periarfissaqartinnerisigut.

Taamatut oqaaseqarlunga oqaluuserisassaaq Inatsisartunut suliassanngortippara.